



SAMOSTALNI SINDIKAT OSNOVNOG OBRAZOVANJA I ODGOJA
FEDERACIJE BOSNE I HERCEGOVINE

INDEPENDENT TRADE UNION OF PRIMARY SCHOOLS EDUCATION OF
THE FEDERATION OF BOSNIA AND HERZEGOVINA

Obala Kulina bana broj 1 71000 S A R A J E V O

Tel/fax: ++387 33 20 52 79 Tel/fax: ++387 33 21 32 56

E-mail: schools@bih.net.ba; schools1@bih.net.ba Web: www.sobih.ba

Transakcijski račun broj: 3389002206183142 UniCredit Bank Sarajevo;

Identifikacioni broj: 4200275500007 Porezni broj: 01075330

Broj: 01-719/16

Sarajevo, 23. maj/svibanj 2016. godine

BOSNA I HERCEGOVINA
FEDERACIJA BOSNE I HERCEGOVINE
VLADA FEDERACIJE BOSNE I HERCEGOVINE
- n/r Fadil Novalić, premijer
SARAJEVO
Ul. Alipašina 41

PREDMET: Zahtjev za stavljanje van snage Rješenja
Vlade Federacije Bosne i Hercegovine,
Akt broj: 06-05-218/2016 od 13.05.2016. godine

Poštovani,

U skladu sa dogovorom postignutim na sastanku predstavnika Samostalnog sindikata osnovnog obrazovanja i odgoja Federacije Bosne i Hercegovine i predstavnika Vlade Federacije Bosne i Hercegovine, održanom u sjedištu Vlade Federacije Bosne i Hercegovine, dana 19.05.2016 godine, **dostavljamo Vam zahtjev (sa obrazloženjem) za stavljanje van snage Rješenja Vlade Federacije Bosne i Hercegovine, Akt broj: 06-05-218/2016 od 13.05.2016. godine.**

Osporenim Rješenjem Vlade Federacije Bosne i Hercegovine je oglašeno ništavnim Rješenje o upisu u Registar udruženja kod Federalnog ministarstva pravde Samostalnog sindikata osnovnog obrazovanja i odgoja Federacije Bosne i Hercegovine, te naloženo njegovo brisanje iz Registra koji se vodi kod nadležnog Ministarstva.

Osporeno Rješenje Vlade Federacije Bosne i Hercegovine je očigledno pravno neutemeljeno, proizvoljno, ishitreno i neargumentovano, te u suprotnosti kako sa važećim propisima koji su u primjeni u Bosni i Hercegovini, odnosno Federaciji Bosne i Hercegovine, tako i relevantnim odredbama međunarodnog prava.

O b r a z l o ž e n j e:

1. Osporeno Rješenje o oglašavanju ništavnim Rješenja o upisu u Registar udruženja kod Federalnog ministarstva pravde Samostalnog sindikata osnovnog obrazovanja i odgoja Federacije Bosne i Hercegovine, koje je Vlada Federacije Bosne i Hercegovine donijela na osnovu člana 265. stav 3. Zakona o upravnom postupku (Sl. novine FBiH, broj 2/98, 48/99) je **nezakonito**. U konkretnom slučaju ne postoji niti jedan razlog propisan članom 264. Zakona o upravnom postupku zbog kojeg se rješenje može oglasiti ništavnim. Naime, članom 264. Zakona o upravnom postupku je propisano da se ništavim oglašava rješenje:

“1) koje je u upravnom postupku doneseno u stvari iz sudske nadležnosti ili u stvari o kojoj se uopće ne može rješavati u upravnom postupku” – što ovdje nije slučaj;

“2) koje bi svojim izvršenjem moglo prouzrokovati neko djelo kažnjivo po kaznenom zakonu” – što ovdje također nije slučaj. Naime, Rješenjem Federalnog ministarstva pravde o upisu u Registar udruženja Samostalnog sindikata osnovnog obrazovanja i odgoja Federacije Bosne i Hercegovine izvršen je upis ovog Sindikata u Registar udruženja koje se vodi kod nadležnog Federalnog ministarstva pravde, čime je ovaj Sindikat registrovan na nivou Federacije Bosne i Hercegovine, što nije, niti je moglo prouzrokovati bilo kakvo djelo kažnjivo po krivičnom zakonu, a takvo djelo svakako nije počinio ni ovaj Samostalni sindikat;

“3) čije izvršenje uopće nije moguće” – što ovdje također nije slučaj;

“4) koje je donio organ bez prethodnog zahtjeva stranke (član 124.), a na koje rješenje stranka nije naknadno izričito ili prećutno pristala” - što ovdje nije slučaj, obzirom da je upis izvršen upravo na osnovu zahtjeva stranke, odnosno Samostalnog sindikata;

“5) koje sadrži nepravilnost koja je po nekoj izričitoj zakonskoj odredbi predviđena kao razlog ništavosti” – što apsolutno nije slučaj. Naime, Rješenje o upisu u Registar udruženja Samostalnog sindikata osnovnog obrazovanja i odgoja Federacije Bosne i Hercegovine Federalno ministarstvo pravde je donijelo u skladu sa važećim Zakonom o udruženjima i fondacijama (Sl. novine FBiH, broj 45/02) i u zakonom propisanoj proceduri. Analogno tome, Federalno ministarstvo pravde bi vratilo na uređenje ili bi odbilo zahtjev za upis u Registar da Samostalni sindikat nije dostavio potpunu, odnosno u skladu sa zakonom svu potrebnu i validnu dokumentaciju za upis u Registar udruženja. Protiv Rješenja o upisu u Registar Samostalnog sindikata je svako zainteresovano lice (koje je imalo pravni interes) moglo pokrenuti upravni spor u roku od 30 dana. Međutim, takav spor nije pokrenut, te je Rješenje o upisu u Registar Samostalnog sindikata istekom roka za podnošenje tužbe i pokretanje upravnog spora postalo i pravosnažno, i to prije više od tri godine.

Dakle, Rješenje o registraciji Samostalnog sindikata ne sadrži bilo kakve nepravilnosti, a kamoli nepravilnosti koje bi prema nekoj zakonskoj odredbi mogle biti razlogom njegove ništavosti, za što ni Vlada Federacije Bosne i Hercegovine u spornom Rješenju nije dala niti jedan dokaz odnosno ukazala na takvu zakonsku odredbu.

2. U potpunosti neosnovanim smatramo i navode u obrazloženju osporenog Rješenja Vlade FBiH, da prilikom donošenja Rješenja o upisu u Registar Samostalnog sindikata nisu pravilno primjenjene odredbe Zakona o upravnom postupku i Zakona o udruženjima i fondacijama Federacije Bosne i Hercegovine. U obrazloženju osporenog Rješenja kao zamjerka se navodi, između ostalog, to da „*Statutom Samostalnog sindikata osnovnog obrazovanja i odgoja Federacije Bosne i Hercegovine nije uređen način donošenja finansijskog izvještaja i izvještaja o radu...*“, iako je ta obaveza utvrđena članom 14. Zakona o udruženjima i fondacijama Federacije BiH.

Ova tvrdnja nije tačna - naime, članom 20. stav 1. alineja 6. Statuta Samostalnog sindikata osnovnog obrazovanja i odgoja Federacije Bosne i Hercegovine utvrđeno je da Upravni odbor podnosi izvještaj o svom radu Skupštini na usvajanje, a članom 11. stav 1. alineje 7. i 8. propisano je da Skupština kao najviši organ Samostalnog sindikata „razmatra i usvaja izvještaje Upravnog odbora, Statutarne komisije, Nadzornog odbora i Sekretarijata.

Također, članom 20. stav 1. alineja 34. Statuta propisano je da Upravni odbor „*razmatra godišnji izvještaj o svom radu i finansijskom poslovanju i usvaja završni račun Samostalnog sindikata*“, a alinejom 35. istog člana propisano je da „*najmanje jednom godišnje razmatra izvještaj Nadzornog odbora o finansijskom poslovanju Samostalnog sindikata*“. Članom 27. stav 10. Statuta utvrđena je obaveza Upravnog odbora da razmatra izvještaje Nadzornog odbora, a Nadzorni odbor je prema članu 27. stav 6. Statuta nadležan da „*vrši nadzor nad ostvarivanjem politike finansiranja, prilivom i korištenjem članarine i drugih finansijskih sredstava ... i o tome najmanje jedanput godišnje informiše članstvo i Upravni odbor...*“. Dakle, iz navedenog, kao i činjenice da je Samostalni sindikat svoje finansijsko poslovanje vodio u skladu sa važećim računovodstvenim i finansijskim propisima, te blagovremeno predavao završne račune kod ovlaštene institucije (AFIP/FIA), jasno se vidi neosnovanost tvrdnji o navodnim nedostacima u Statutu koje bi, prema obrazloženju iz osporenog Rješenja Vlade Federacije Bosne i Hercegovine, mogli dovesti do eventualnih zloupotreba. Čak i kada bi takvi nedostaci postojali, što ovdje nije slučaj, isti nisu i ne mogu biti razlog za oglašavanje ništavnim Rješenja o upisu u Registar shodno članu 264. Zakona o upravnom postupku.

Vlada FBiH, kojoj je dostavljena „inicijativa“ za oglašavanje Rješenja o upisu Samostalnog sindikata u Registar udruženja ništavnim, imala je mogućnost postupiti u skladu sa članom 47. i 48. Zakona o udruženjima i fondacijama FBiH, te tražiti provođenje upravnog inspekcijskog nadzora, gdje bi inspekcija u slučaju postojanja eventualnih nepravilnosti sačinila zapisnik, naložila otklanjanje nepravilnosti, te o tome obavijestila Vladu.

3. Pored gore navedenih činjenica iz kojih se vidi da je Rješenje Vlade Federacije Bosne i Hercegovine, Akt broj: 06-05-218/2016 od 13.05.2016. godine u suprotnosti sa relevantnim zakonskim odredbama, osporeno Rješenje je u suprotnosti i sa međunarodnim standardima koji regulišu pravo na organizovanje i djelovanje sindikata, od kojih standarda su pojedini sastavni dio Ustava Bosne i Hercegovine i Federacije Bosne i Hercegovine, i imaju supremaciju nad domaćim zakonodavstvom. Naime, Ustav Bosne i Hercegovine u članu 2. pored ostalog propisuje da će država Bosna i Hercegovina i i njeni entiteti osigurati najviši nivo međunarodno priznatih prava i sloboda iz Evropske konvencije za zaštitu ljudskih prava i sloboda i njenih protokola, te obezbijediti njihovu direktnu primjenu u BiH, kao i da međunarodni standardi imaju prioritet nad svim ostalim zakonima i supremaciju nad domaćim zakonodavstvom.

U istoj odredbi člana 2. Ustava BiH u tački 3. utvrđen je **KATALOG PRAVA** u kojem je, između ostalog propisano pravo na slobodu mirnog okupljanja i slobodu udruživanja. Aneksom I Ustava BiH utvrđeni su i dodatni Sporazumi o ljudskim pravima koji će se primjenjivati u Bosni i Hercegovini. Međutim, sporazumima su i Evropska konvencija za zaštitu ljudskih prava i osnovnih sloboda, Međunarodni pakt o građanskim i političkim pravima i opcioni Protokoli, te Međunarodni pakt o ekonomskim, socijalnim i kulturnim pravima.

Evropska konvencija za zaštitu ljudskih prava i osnovnih sloboda, u članu 11. utvrđuje da „*svako ima pravo mirnog okupljanja i slobode udruživanja sa drugima, uključujući pravo osnivanja ili pristupanja sindikatima radi zaštite svojih interesa*“ kao i da se „*ne mogu postavljati nikakva ograničenja vršenju tih prava sem onih koja su nametnuta u skladu sa zakonom i koja su potrebna u demokratskom društvu u interesu državne ili javne sigurnosti, radi sprečavanja nereda ili zločina, radi zaštite zdravlja ili morala ili radi zaštite prava i sloboda drugih.*“

Međunarodni pakt o ekonomskim, socijalnim i kulturnim pravima u članu 8. utvrđuje da se države članice ovog pakta obavezuju osigurati:

- *stav 1. alineja a): "Pravo svakoga da, u cilju unapređenja i zaštite svojih ekonomskih i socijalnih interesa, osniva sindikate i stupa u sindikate po svom izboru, zavisno jedino od pravila odnosne organizacije. Tom se pravu ne mogu postavljati nikakva ograničenja sem onih koja su propisana zakonom i koja su potrebna u demokratskom društvu i interesu državne sigurnosti ili pravnog poretka ili za zaštitu prava i sloboda drugih.*
- *stav 3: Ništa u ovom članu ne ovlašćuje države članice Konvencije međunarodne organizacije rada iz 1948. godine o slobodi sindikalnog udruživanja i zaštiti prava na udruživanje da preduzmu zakonodavne mjere koje bi bile na štetu garancija iz te konvencije ili da primjene zakon na način koji bi bio na štetu tih garancija".*

Međunarodni pakt o građanskim i političkim pravima i opcioni protokoli u članu 22. na gotovo identičan način kao i Međunarodni pakt o ekonomskim, socijalnim i kulturnim pravima reguliše „pravo koje ima svako lice da sa drugima osniva sindikate i da se učlani se u sindikat po svom izboru, uz jedini uslov da pravila budu utvrđena od strane zainteresovne organizacije“ (tj. sindikata). Također, utvrđuje da „nijedna odredba ovog člana ne dopušta državama članicama Konvencije Međunarodne organizacije rada iz 1948. godine o slobodi sindikalnog udruživanja i zaštiti prava da donosi zakonske mjere koje bi narušavale ili da primjenjuju zakon na način koji bi narušavao garancije predviđene navedenom konvencijom“.

Nadalje, Konvencija Međunarodne organizacije rada broj 87 o slobodi sindikalnog udruživanja i zaštiti prava na udruživanje, kao i Konvencija Međunarodne organizacije rada broj 98 o pravu sindikata na kolektivno pregovaranje, sastavni su dio Filadelfijske deklaracije i Deklaracije Međunarodne organizacije rada o temeljnim načelima i pravima pri radu koju su sve države članice Međunarodne organizacije rada dužne sprovesti temeljem samog članstva u Međunarodnoj organizaciji rada.

Konkretno, Konvencija Međunarodne organizacije rada broj 87 o slobodi sindikalnog udruživanja i zaštiti prava na udruživanje utvrđuje:

- *član 2: „Radnici i poslodavci, bez ikakvih izuzetaka, imaju pravo bez prethodnog odobrenja, da obrazuju organizacije po svom izboru, kao i da pristupaju ovim organizacijama pod isključivim uslovom da se pridržavaju statuta ovih posljednjih“.*
- *član 3: “Radničke i poslodavačke organizacije imaju pravo na donošenje svojih statuta i administrativnih pravila, slobodnih izbora svojih predstavnika, organizovanje svoga upravljanja i djelatnosti i formulisanje svog akcionog programa. Javne vlasti moraju se uzdržavati svake intervencije takve prirode koja bi imala za cilj ograničenje ovog prava ili ometanje zakonskog izvršenja.“*
- *član 4: “Radničke i poslodavačke organizacije ne mogu biti raspuštene ili njihove djelatnosti obustavljene administrativnim putem.“*
- *član 7: „Dobijanje svojstva pravnog lica od strane radničkih i poslodavačkih organizacija, njihovih federacija i konfederacija, ne može biti podvrgnuto uslovima takve prirode koji bi mogli dovesti u pitanje primjenu odredbi članova 2, 3, 4.“*

4. Kada je u pitanju tvrdnja iznesena u osporenom Rješenju Vlade Federacije Bosne i Hercegovine da je Federalno ministarstvo pravde donoseći Rješenje, Akt broj: 03-05-2-1659/12 od 18.03.2013. godine nezakonito oglasilo prestanak rada “*nepostojećeg udruženja*” (Samostalnog sindikata osnovnog obrazovanja i odgoja Bosne i Hercegovine), postavlja se logično pitanje kako se može (zakonito ili nezakonito) oglasiti prestanak rada udruženja koji ne postoji? Stvarno stanje je da je Samostalni sindikat osnovnog obrazovanja i odgoja Bosne i Hercegovine osnovan 1990. godine, kada su se dotadašnji odbori grana i djelatnosti, (koji su bili radna tijela Saveza sindikata Bosne i Hercegovine), u skladu sa odlukom Kongresa Saveza sindikata BiH registrovali kao samostalni pravni subjekti, zbog čega je i tadašnji Savez sindikata BiH promjenio naziv u Savez samostalnih sindikata BiH.

Dakle, ovaj Sindikat registrovan je još 1990. godine kod Višeg suda u Sarajevu – Rješenje broj: R-II-58/90 od 17.07.1990 godine, a svoj Prvi poslijeratni Kongres održao je 05.07.1997. godine, nakon čega je i vršio promjene u registraciji kod nadležnog registarskog organa.

Prema potvrdi Kantonalnog suda Sarajevo Samostalni sindikat nije brisan iz registra udruženja dok je taj sud vodio ovaj registar. Isključivo zbog uskraćivanja odobrenja od nadležnih organa za službenu upotrebu imena “Bosna i Hercegovina” u nazivu Samostalnog sindikata (zbog čega je vođena višegodišnja pravna borba), nadležni organi Samostalnog sindikata osnovnog obrazovanja i odgoja Bosne i Hercegovine donijeli su odluku o promjeni naziva i registraciji ovog sindikata sa izmjenjenim nazivom na nivou Federacije Bosne i Hercegovine, te odluku o održavanju osnivačke skupštine Samostalnog sindikata osnovnog obrazovanja i odgoja Federacije Bosne i Hercegovine. Po održanju Osnivačke skupštine, u skladu sa odlukama iste preduzete su potrebne radnje za upis Samostalnog sindikata osnovnog obrazovanja i odgoja FBiH u Registar udruženja kod Federalnog ministarstva pravde, nakon čega je prethodni sindikat prestao sa radom (npr. o karakteru roka iz člana 52. Zakona o udruženjima i fondacijama Federalni parlament zauzeo je stav u autentičnom tumačenju ovog člana, objavljenom u Sl. novinama FBiH broj 85/07).

Dakle, Samostalni sindikat osnovnog obrazovanja i odgoja BiH nije bio “nepostojeće udruženje”, nije prestao sa radom na nezakonit način, već voljom svog članstva izraženom kroz nadležne organe sindikata, koji su odlučili da ovaj Sindikat nastavi raditi i djelovati kao Samostalni sindikat osnovnog obrazovanja i odgoja Federacije Bosne i Hercegovine, što je njihovo neotuđivo pravo.

Svi članovi Samostalnog sindikata osnovnog obrazovanja i odgoja Bosne i Hercegovine postali su članovi Samostalnog sindikata osnovnog obrazovanja i odgoja Federacije Bosne i Hercegovine, **koji kao jedini reprezentativni Sindikat predstavlja preko 22.000 radnika u osnovnom obrazovanju i odgoju u Federaciji Bosne i Hercegovine**, i u ostvarivanju njihovih prava nije se ništa promijenilo.

Vezano za potpuno neosnovane i neargumentovane tvrdnje o navodnom nezakonitom prenosu imovine, pored gore navedene i obrazložene činjenice da se radi o potpuno istoj organizaciji koja je samo promijenila naziv, samo opreza radi treba istaći da Samostalni sindikat osnovnog obrazovanja i odgoja Bosne i Hercegovine nije ni imao imovinu već je koristio (kao što je danas koristi i Samostalni sindikat osnovnog obrazovanja i odgoja Federacije Bosne i Hercegovine) imovinu Saveza samostalnih sindikata BiH, kao i svi drugi granski sindikati članice Saveza samostalnih sindikata BiH.

Kada je u pitanju neosnovana i neargumentovana tvrdnja o navodnom ugrožavanju javnog interesa, ponovo ističemo da je Samostalni sindikat osnovnog obrazovanja i odgoja legalna i legitimna organizacija, da nije nezakonito učestvovao u pregovorima oko zaključivanja kolektivnog ugovora, niti je na bilo kakav drugi način ugrozio ili ugrožavao javni interes, nego naprotiv o tome govori i Presuda Općinskog suda u Sarajevu iz 2013. godine u korist Samostalnog sindikata osnovnog obrazovanja i odgoja Bosne i Hercegovine u kojoj se utvrđuju da su odredbe Kolektivnog ugovora za djelatnost osnovnog obrazovanja i odgoja Federacije Bosne i Hercegovine u skladu sa Ustavom i Zakonom o radu.

Opravdano se postavlja pitanje da li je Rješenje Vlade Federacije Bosne i Hercegovine o ništavnosti Rješenja o upisu u Registar Udruženja kod Federalnog ministarstva pravde Samostalnog sindikata osnovnog obrazovanja i odgoja Federacije Bosne i Hercegovine pokušaj da se sve presude u korist radnika po osnovu nepoštivanja Granskog kolektivnog ugovora riješe na način da se poništi Rješenje o registraciji Sindikata i Kolektivni ugovor oglasi nevažećim?

Puno je koincidencije u terminima donošenja nezakonite Odluke Vlade FBiH i javnim istupima prvog čovjeka iste te Vlade.

Ovo je jedini Reprezentativni sindikat osnovnog obrazovanja i odgoja u Federaciji Bosne i Hercegovine, čime je samo potvrđen njegov subjektivitet, legalitet i legitimitet, odnosno njegovo zakonsko pravo da se bori za prava i interese svojih članova, te da u njihovo ime pregovara i zaključuje kolektivne ugovore.

S druge strane, javni interes je ugrožen donošenjem osporenog Rješenja od strane Vlade FBiH, jer je istim više od 22.000 radnika dovedeno u situaciju da ostanu bez kolektivnih ugovora, odnosno bez jedinog pravnog akta koji definiše njihova materijalna prava po osnovu radnog odnosa. Možda se u tome i krije stvarna pozadina nezakonite odluke Vlade Federacije Bosne i Hercegovine!

5. O svim gore navedenim odlukama, aktivnostima odnosno stvarnom stanju itekako je upoznat i gospodin Ibrahim Dedić, koji se predstavlja kao predsjednik Samostalnog sindikata obrazovanja i odgoja Kantona Sarajevo, i koji je “pokretač” inicijative koja je prethodila spornom Rješenju Vlade Federacije Bosne i Hercegovine . Gospodin Dedić je u vrijeme postojanja Samostalnog sindikata osnovnog obrazovanja i odgoja Bosne i Hercegovine bio član njegovih organa, odnosno organizacionih dijelova, i učestvovao je u donošenju svih odluka koje sada pokušava osporiti, isključivo iz razloga što ga članstvo nije izabralo niti na jednu funkciju u ovom Samostalnom sindikatu.

Na kraju, a obzirom da je iz obrazloženja spornog Rješenja Vlade FBiH vidljivo da je “inicijativu” u ime Samostalnog sindikata obrazovanja i odgoja Kantona Sarajevo podnio advokat Adija Jogić, nije naodmet pomenuti da je advokat Jogić za pokretanje ove inicijative morao imati pravno valjanu punomoć. Punomoć za zastupanje mogao je dati samo predsjednik ovog sindikata, gosp. Ibrahim Dedić.

Međutim, iako se drugačije predstavlja, ovaj Sindikat se ne može smatrati registrovanim, jer Rješenje o upisu u Registar istog nikada nije postalo pravosnažno. Naime, pred Kantonalnim sudom u Sarajevu vodi se sudski postupak (upravni spor) radi poništenja ovog rješenja.

Činjenicu da Rješenje o upisu u registar navedenog sindikata nije pravosnažno potvrđuje Ministarstvo pravde i uprave Kantona Sarajevo u svom odgovoru na poslaničko pitanje br: 03-03-05-110/16 od 08.01.2016.godine u kojem stoji:

„Po predmetnoj tužbi Kantonalni sud u Sarajevu nije donio odluku tako da rješenje br. 03-05-05-2075/13 od 30.05.2013. god o upisu Udruženja Samostalni sindikat obrazovanja i odgoja Kantona Sarajevo u Registar udruženja nije postalo pravosnažno.“

To znači da postupak registracije odnosno dobijanja svojstva pravnog lica za ovaj sindikat još nije pravomoćno završen, što sve pravne radnje ovog sindikata ili njegovog "ovlaštenog lica", uključujući i davanje punomoći, dovodi u pitanje.

Potpuno razumijemo potrebu vraćanja određenih dugova Vlade Federacije Bosne i Hercegovine prema pomenutom gospodinu Dediću, jer je on i njegov minorni sindikat jedan od onih koji je podržao neustavan način donošenja Zakona o radu u FBiH, kojim se u značajnoj mjeri derogiraju i urušavaju radnička prava.

* * *

Na osnovu naprijed navedenih činjenica, još jednom tražimo od Vlade Federacije Bosne i Hercegovine da osporeno Rješenje, Akt broj: 06-05-218/2016 od 13.05. 2016. godine o oglašavanju ništavnim Rješenja o upisu u Registar udruženja kod Federalnog ministarstva pravde Samostalnog sindikata osnovnog obrazovanja i odgoja Federacije Bosne i Hercegovine poništi, odnosno stavi van snage kao očigledno neosnovano i nezakonito.

Stavljanjem van snage spornog Rješenja Vlada Federacije Bosne i Hercegovine bi prevenirala pokretanje i vođenje upravnog spora i time sačuvala svoj kredibilitet, obzirom da su svi argumenti na našoj strani, te osigurala vladavinu prava i pravnu sigurnost.

Stavljanje van snage osporenog Rješenja preveniralo bi i naše obraćanje Međunarodnoj organizaciji rada i Evropskim pravosudnim institucijama, kao i druge, daleko radikalnije vidove sindikalne borbe preko 22.000 radnika, koji sigurno neće mirno gledati kršenje elementarnih radničkih i sindikalnih prava.

Brisanjem iz Registra Samostalnog sindikata osnovnog obrazovanja i odgoja Federacije Bosne i Hercegovine nastala bi nenadoknadviva šteta za više od 22.000 radnika Samostalnog sindikata osnovnog obrazovanja i odgoja u Federaciji Bosne i Hercegovine, čime bi na najgrublji način bio ugrožen i javni interes, za što bi svi oni koji su odgovorni sigurno snosili zakonske posljedice.

Ovdje posebno ističemo činjenicu da je odredbom člana 182. Zakona o radu (Sl. novine FBiH, broj 26/16) propisano da se važeći kolektivni ugovori moraju uskladiti sa zakonom u roku od 120 dana, te da u suprotnom prestaje njihova primjena.

Samostalni sindikat osnovnog obrazovanja i odgoja Federacije Bosne i Hercegovine jedini je reprezentativni sindikat za djelatnost osnovnog obrazovanja i odgoja za na teritoriji Federacije Bosne i Hercegovine, te kao takav prema novom zakonu jedina ovlaštena ugovorna strana Kolektivnog ugovora za djelatnost osnovnog obrazovanja i odgoja za teritoriju Federacije Bosne i Hercegovine na strani radnika, dok su njegove kantonalne podružnice ugovorne strane kolektivnih ugovora za teritoriju odnosno kantone.

Izvršenjem spornog Rješenja odnosno brisanjem iz registra Samostalnog sindikata osnovnog obrazovanja i odgoja isti bi izgubio svojstvo pravnog lica i subjektivitet, a samim tim i reprezentativnost, te shodno članu 122. u vezi sa članom 131. Zakona o radu ne bi mogao pristupiti pregovorima niti u zakonskom roku, koji je vrlo kratak, ispregovarati kolektivni ugovor/e kojima su regulisana sva materijalna prava iz radnog odnosa za više od 22.000 radnika u osnovnom obrazovanju i odgoju u Federaciji Bosne i Hercegovine.

Vjerujemo da ćete kao ozbiljna Vlada, svjesni odgovornosti koju imate, postupiti razumno i racionalno i uvažiti naš zahtjev za stavljanjem van snage gore navedenog Rješenja, te da ćemo u dobroj vjeri i uz obostrano uvažavanje nastaviti sa socijalnim dijalogom i kolektivnim pregovorima.

S poštovanjem,

Prilog:

- Odgovor Službe za skupštinske poslove Kantona Sarajevo na zastupničko pitanje zastupnika Zvonke Marića
- Akt broj: 03-03-05-110/16 od 08.01.2016.g.



